



## Sujet: «Sali zämme...»

«**Sali zämme!**» kha men an allne Daage  
**bym Kho und au bym Abschiid saage.**  
Byvor mr aber Abschiid nämme,  
zerscht e hätzlig «**Sali zämme**»:

«**Bonjour du lieby Bebbi-Pflutte**»,  
hesch es gschaft an d **Cortege-Route?**  
Denn bisch du gschiggt und au no gscheyt!  
Denn en Andere wär in e Bauschtell gheit.  
...denn kuum kunsch uss dr Diiren uuse:  
Scho s erschte Loch – es isch zem gruuse!  
Denn suechsch dy Kaare – aber s het kai Zwägg:  
Dä isch samt Parkplatz iber d Nacht ewägg!

Drum ab uffs Drämmli, wenn das goht  
und s nid grad wäg e bitz Schnee ummeschtoht.  
...sunscht muesch halt mit em Velo dur Basel saue..  
(fir das, muess men au kai Rhyytunnel baue)  
Mir **Güllis** hän ys ebbys anders traut  
und e **Waggis-CarSharing-Waage** baut.

«**Saluti Digge, bisch au doo?**»  
...und bisch per pedes doo aane khoo?  
Will: Laufe, renne oder tschogge  
bringt dy Fitness glatt zum rocke!  
Numme Musggle – kai Grämmli Fett –  
isch das, wo denn dy Kerper het!  
Es isch au gsund, dy Body z trimme...  
...mit Gymnastyg oder Schwimme...  
Im Rialto, schterggsch dyny Waade.  
...kasch bald au im MusicalTheater baade.  
(aber daas – ganz im Vertraue  
nur sofärn sy s iberhaupt dien baue)

A propos Fitness, Kraft und Laischtyg:  
Die bruuchts nid nur kerperlich sondern au gaischtyg!  
Drum hän mir **Güllis** (es deent zwar gsuecht)  
en äggstra ClubSchuel-Kürsli buecht:  
Esoo isch jeede uss dr **Güllis-Horde**  
zum **Prof. Dr. Waggis** worde!  
(dr Eric Wäber kha sich dä Kurs aber schängge:  
Will e Fiidle kha mit em Arsch nid dängge!)

«**Guten Tach**» (das wär fir d Schwoobe  
ussem hoche Norden oobe),  
kemmed ihr kho d **Fasnacht** gniesse?  
...und s Gniesse miteme Wyy z begiesse?  
Wie wänn die das mache im groosse Ganze?  
Denn däne ihry Wirtschaft liggt am Ranze!  
Und «dangg» AfD muesch nach de Wahle  
wider mit «deutschen ReichsMark» zaahle.

«**Hello my dear**» hän mr fascht vergässe,  
drbyy isch doch ain druff versässe,  
dass men ihn ganz bsunders nennt  
und als Wälteretter anerkennt:  
Dä trumpy Orang-Utan het drum d Idee,  
är kaufy schnäll Grönland mitsamt em Schnee.  
Und falls es mol nid grad richtyg schneyt,  
wird bym Warte kurz d Ukraine vom Krieg befreyt.  
«**Pri-wjét**» maint doo dr Putin drogge,  
will ihn scho lang nüt me kha schogge.

«**Grüezi – hier Schweiz**» gfallt uns doo meh.  
So dönts den nämmlich am ESC.  
Switzerland ten points dönts denn zu rächt!  
Und für d Fraue-EM wär das au nit schlächt.

Es gäbty doo no vyl z verzelle,  
wo uns **Güllis** ächt duet schelle.

Doch bevor mr jetzt no uffem **Waage** ain nämme:  
Wird **by uns Passivmitglied!** Und «**Sali zämme!**»